

1351

澗溪居士集

五



騰錄監生臣黃維

騰錄監生臣雷琳

欽定四庫全書

樵溪居士集卷七

宋 劉才邵 撰

勅書

案黃鑑揚文公談苑學士草文賜六品以下曰勅書賜外國曰蕃書而此賜平南王三佛

齊國王皆曰勅書想名目亦隨時變易而未有一定耶附識於此

賜李天祚勅書

案宋史全文續通鑑紹興二十五年七月甲戌交趾郡王李天祚進

封平南王以天祚遣使入貢故有是命宋史外國

傳紹興二十六年八月天祚遣李國等以金珠沈

水香翠羽良馬馴象來貢詔加天祚檢校太師增

食邑勅書直稱平南王則當是進封之後且有每

馳貢篚肆加錫命之語其為二十

六年所降勅書可知附識於此

勅南平王李天祚博施德澤寵綏萬方眷惟外服之臣
世守故封之職奉王靈而嚮化謹侯度以效忠雖宅海
邦不憚梯航之遠每馳貢篚用傾葵藿之誠肆加錫命
之優昭示榮懷之渥往其祗服圖稱明恩今賜卿馬二
匹金鍍銀作子鞍一付纓紱全衣一襲紫羅夾公服一
領熟白小綾寬汗衫一領熟白小綾勒帛一條熟白大
綾寬夾袴一腰紅羅夾繡三襜一條抱肚一條二十五
兩金御僊花腰帶一條五十兩白成銀腰帶匣一具金

花銀一百兩鈔羅二面衣著共雜色絹二百匹綠絹二
十三匹赤黃絹二十三匹緋絹三十匹淺色絹二十二
匹碧絹二十二匹槐黃絹二十六匹粉紅絹二十四匹
至可領也故茲示諭想宜知悉秋涼卿比好否遣書指
不及多

賜三佛齊國勅書

崇宋史外國傳紹興二十六年三佛齊國王悉利麻霞囉

咤遣使入貢復獻真珠詔償其直而收之故賜此勅書以答之也附識於此

勅三佛齊國王悉利麻霞囉咤省所奏差蒲晉等進真

珠犀角象牙珊瑚香藥等物卿世居南裔欽慕中邦遣使傳以造朝奉國珍而效貢深惟勤恪良用歎嘉特厚匪頒用將眷意今賜卿初封寬衣一對六件紫羅夾公服一領小綾寬汗衫一領勒帛一條熟大帛綾寬夾褲一腰紅羅繡夾三襜一副抱肚一條二十四兩素金腰帶一條銀五十兩素腰帶匣一具雜色衣著絹二百匹金花銀器二百兩鈔鑼二面馬一匹八十兩鬮裝銀鞍轡一副纓紱全并回賜卿生綾一千一百七十匹生壓

羅三百匹生剋絲六百匹生樗蒲綾六百匹雜色綾六
千匹江南絹二萬五千匹錦六百匹青錦三百匹紅錦
三百匹銀二萬一千兩及別賜翠花紅法錦襖子一領
二十四兩金腰帶一條銀器二百兩衣著絹三百匹白
馬一匹八十兩數鬧裝銀鞍轡一副纓紱全至可領也
故茲示諭想宜知悉春寒卿比好否遣書指不多及

賜昭慶軍勅書

案集前有劉楸辭免昭慶軍節
度使恩命不允詔此勅書乃即

同時所
頒者

勅昭慶軍官吏軍民僧道耆壽等朕以劉楸性資純明
德履方重播謙恭之令譽負通變之全才况聯戚里之
華宜舉褒章之寵授以將鉞鎮於輔藩式資御衆之權
以壯總戎之寄既頒成命想愜輿情今特授劉楸昭慶
軍節度使依前提舉佑神觀奉朝請進封開國侯加
食邑五百戶食實封二百戶故茲示諭想宜知悉冬寒
汝等各比好否遣書指不多及

賜寧武軍勅書

案集前有吳蓋除節度使制此勅書亦同時所頒者

勅寧武軍官吏軍民僧道等朕以吳蓋德性深純材猷
敏茂聯芳后族為國懿親俾肇建於高牙以䟽榮於制
閫茂因明命臨鎮益川諒屬聽聞無不欣懌今特授吳
蓋寧武軍節度使依前提舉佑神觀奉朝請進封開國
公加食邑五百戶食實封二百戶故茲示諭想宜知悉
夏熟汝等各比好否遣書指不多及

口宣

賜宰臣喜雪御筵酒果口宣

案宋史全文續通
鑑紹興十三年十

二月癸巳賜喜雪御筵於尚書省初復故事也此口宣乃循常例當在十三年以後者

有勅璿穹垂祐瑞雪應時慶已協於豐穰恩式隆於燕
衍申頌珍品以侑驩康

賜宰執以下喜雪御筵口宣

有勅六出殊祥三登嘉兆顧此至和之應實惟變理之
功錫宴示慈丕昭至意

賜宰執以下喜雪御筵口宣

有勅卿等嚴冬屆節瑞雪應時實彰變理之功共慶豐

登之兆肆頒慈宴以示殊恩

賜大金人使賀正旦畢歸驛賜御筵口宣

有勅慶儀既展賓館少休肆舉彝章式頒慈宴用昭眷

待宜對恩私

賜交趾朝見後三日王津園御筵口宣

案宋史外國傳

紹興二十六年命右司郎中汪應辰宴安南使者於玉津園考交趾唐至德中為安南都護故

亦稱安南附識於此

有勅卿等遠脩貢職來供闕庭既肅展於使儀宜繼頒

於慈宴往其祗服欽奉恩私

三佛齊國使人入貢到闕起發前一日賜御筵

口宣

有勅卿等肅持貢幣來自遐方茲復命以言歸宜示慈而式燕是為茂渥宜體恩榮

殿前司滿散天申節道場賜御筵酒果口宣

有勅卿等總統千廬式嚴於警衛祝延萬壽益見於忠勤爰致匪頒用昭眷意

馬軍司滿散天申節道場賜御筵酒果口宣

有勅卿等總提七萃擁扈九重欣逢慶誕之辰虔致壽
祺之祝匪頒示寵眷渥其膺

賜宰執以下喜雪酒口宣

有勅卿等瑞降祥靈恩頒廣宴錫以樽醪之旨副之籩
核之芳式侑歡康併昭慈惠

賜參政沈該再辭免恩命不允批荅口宣

案集前有

賜沈該辭免恩命不允詔乃紹興二十六年十
二月該自參知政事拜左僕射同平章事時所

降此蓋因其再辭故復
答以口宣也附識於此

有勅卿以宏才深識參預政機茲特錫渙章進當鼎鉉
往其欽受毋復來辭

賜尚書左僕射沈該告口宣

案該於紹興二十
六年監修國史集

前有賜該辭免監修不允詔此下口宣三通當
因國史告成加恩復有表辭而答之者附識於
此

有勅卿等調元碩輔命世宏才茲提領於盛儀以光昭
於大典肆推異數用示渙恩今賜卿告想宜知悉

賜沈該辭免恩命不允批答口宣

有勅卿位居元宰望重宗臣茲舉盛儀允資使範肆加
褒典用示殊私

賜沈該再辭免恩命不允批答口宣

有勅卿克就成書允為大典爰推異數式表榮恩宜體
至懷欽承隆數

賜參政万俟卨再辭免恩命不允批答口宣

案万

俟卨自參知政事除守尚書右僕射同平章事
在紹興二十六年五月集前有賜万俟卨辭免

同平章事不允詔此亦當時因其再辭故答以口宣也

有勅卿以碩德遠猷比參大政茲頒新渥進秉國鈞成

命既行勿煩固避

賜尚書右僕射万俟卨告口宣

案高於紹興二十六年提舉實

錄院前有辭免不允詔此下口宣三通當亦答其實錄告成辭免加恩者附識於此

有勅卿躬秉傑才望隆真相實纂修於盛典以克著於

闕休茲錫殊恩式昭至意今賜卿告想宜知悉

賜万俟卨辭免恩命不允批答口宣

有勅卿為時碩輔克致勲庸盛典既成宜褒殊績式隆
眷意爰錫渙恩

賜万俟卨再辭免恩命不允批答口宣

有勅卿總領禮儀光昭盛典肆推褒冊以示殊私往其
欽承祇膺渙號

賜尚書右僕射万俟卨告口宣

案此下口宣二通
當即紹興二十六

年十二月高上重修貢舉令式五十卷詳看法意
四百八十七卷辭免加恩而答之者附識於此

有勅卿以宗臣總提成法載疇嘉績爰錫褒章已告大

成宜即欽受

賜万俟卨辭免恩命不允批答口宣

有勅卿憲令之成總提是賴肆加褒寵用示恩榮茲錫
渙章亟其欽受

撫問程克俊到闕賜銀合茶藥口宣

有勅卿以樞臣作藩輔郡茲造行闕宜示撫存爰錫珍
芳用昭至意

賜知湖州程克俊辭免恩命不允批答口宣

有勅卿以傑才參預大政方資同德協贊機微往其欽
承以副明命

賜承宣使吳蓋辭免恩命不允批答口宣

有勅卿以才猷為時懿戚褒嘉之命國有典常其即欽
承以副眷意

賜承宣使吳蓋再辭免恩命不允批答口宣

案口宣有建節擁旄之語當即因蓋辭免
寧武軍節度恩命而答之者附識於此

有勅卿聯禁后族戚里之英建節擁旄式昭異數宜祇

成命用副至懷

賜張子盖口宣

案賜張子盖二口宣當亦因辭免郊赦加恩而答之者附識於

此

有勅卿以才猷任當閫寄茲備成於大報爰均錫於殊休用示寵光往其祗服

賜張子盖辭免恩命不允批答口宣

有勅朕丕闡盛儀備膺靈貺式均祭澤爰舉慶條其亟

欽承無庸遜避

撫問使大金使陳誠之副使蘓暄到闕賜銀合

茶藥口宣

有勅卿等肅將使指擁節言還念遠歷於川塗諒深勞於履跋爰頒珍劑用示眷懷

撫問郭浩并賜到闕銀合茶藥口宣

案宋史列傳紹興十

年拜浩奉國軍節度使移知金州十四年召見拜檢校少保還鎮十五年浩卒此當即召見到

闕而賜口宣以撫問之也附識於此

有勅卿遠從藩屏來覲闕庭眷言跋涉之勞宜有珍芳

之錫茲惟茂渥用示恩私

賜韋謙辭免恩命不允批答口宣

案集前有賜韋謙辭免節

度使恩命三詔口宣云茲升華於掌武當即同時批答者附識於此

有勅卿戚里懿親將壇制閫茲升華於掌武以昭示於

隆恩其體眷懷往祗茂渥

賜吳國長公主到闕銀合茶藥口宣

案宋史公主列傳秦

國康懿長公主哲宗第三女也初封康懿進嘉國慶國政和二年改韓國出降潘正夫改淑慎帝姬靖康末留於汴建炎初復公主號改封吳國避地婺州紹興四年入見八年再入見留禁

中三日時極暑上每正衣冠對之飲食口宣
有適當炎燠之語正八年時事也附識於此

有勅遠遵川陸來造闕庭適當炎燠之辰宜有珍芳之
錫用彰寵數其體眷懷

賜成閔辭免恩命不允批答口宣

案集前有賜成閔辭免加

恩二詔乃紹興二十五年郊赦加恩時事口宣
有云肆加祭澤當亦同時批答者附識於此

有勅卿殿巖之職勤於警衛肆加祭澤義不容辭宜體
眷懷以副褒寵

賜趙密辭免恩命不允批答口宣

案宋史列傳
密於紹興十

一年為神龍衛四廂都指揮主管侍衛步軍口
宣有任總周廬宣勤祠事之語蓋與集前辭免
恩命不允二詔皆十三
年郊赦加恩同時之命

有勅卿任總周廬宣勤祠事疏恩示眷國有典常其即

欽承以副至意

賜鄭藻告口宣

案宋史顯肅鄭皇后傳后開封人南渡後家屬流寓江南高宗

詔所在尋訪有鄭藻者后近屬也后用后祔廟恩拜隴州防禦使四使金厯官至保信軍節度使口宣將壇重任及元祀禮成之語當是為節度時南郊加恩也

有勅卿將壇重任戚里懿親元祀禮成肆加褒數証敷

渙號宜既欽承

賜李顯忠告口宣

有勅卿任擁將旄肅持軍律精禋肆賚爰錫恩榮成命
既頒徃其祇服

賜步軍司滿散天申節道場香酒果口宣

有勅卿等供衛九重備昭勤恪茲欣逢於慶誕咸善祝
於聖期肆示寵頒用資燕集

賜樞密院官滿散天申節道場香酒果口宣

有勅卿等祇率官聯豫臨梵宇以虔伸於善祝祈壽祉於無疆宜有分頒以資燕衍

賜樞密湯思退辭免恩命不允批答口宣

案集前有

賜湯思退辭免恩命不允
詔此當即同時批答者

有勅卿以碩德傑才朕所簡注樞機之任允藉謀猷成命既頒徃其欽受

賜陳誠之辭免同知樞密院事恩命不允批答

口宣

案集前有賜陳誠之辭免同知樞密院事恩命不允批答者

有勅卿以傑才克膺圖任延登右府協贊機微其體至
懷欽承茂渥

賜實錄院進呈皇太后回鑾事實宣答宰臣已

下口宣

案史載万俟卨纂次太后回鑾事實上之
在紹興二十五年然高提舉實錄院乃二
十六年之命則此書進呈當亦在是年史
所謂二十五年者恐有誤也附識於此

有勅致養東朝欽奉慈訓不闡閔休實資撰述成書既
上深用歎嘉與卿等同之

賜張綱辭免除參政恩命不允批答口宣

案集
有賜

張綱辭免參知政事恩命不允詔此復有口宣而宋史張綱傳不載其有參知事殊為闕漏附識於此

有勅卿以偉傑全才簡在朕意參陪機政允謂得人成命既頒亟其欽受

賜劉楫辭免恩命不允批答口宣

案集前有賜劉楫辭免節

度使不允詔又有賜昭慶軍勅書與此皆同時所降者

有勅卿以懿戚克膺異數申加旄鉞之重俾當藩屏之崇其亟欽承以副眷倚

賜劉楙再辭免恩命不允批荅口宣

有勅卿授任齋壇疏禁侯社茲錫寵章之賁益昭懿戚
之華祗服隆恩欽承殊眷

撫問孟忠厚到闕并賜銀茶合香藥口宣

有勅卿來自近藩肅趨行闕屬屆寒凝之候良多跋履
之勞爰錫珍芳以資輔養

賜大金人使朝辭訖歸驛酒果口宣

案周密南渡典儀北

使到闕先遣伴使賜御筵於赤岸之班荆館中
使傳宣撫問賜龍茶一斤銀合三十兩次日至

北郭稅亭茶酒上馬入餘杭門至都亭驛中使
傳宣賜如前又賜被褥銀鈔鑼等明日臨安府
書送酒食閤門官設朝見儀投朝見榜子又明
日入見於紫宸殿見畢赴客省茶酒遂賜宴於
垂拱殿賜酒果又賜使副衣物等有差明日賜
牲餼元正朝賀禮畢遣大臣就驛賜御筵赴浙
江亭觀潮四日赴玉津園燕射五日大燕集英
殿六日朝辭賜衣帶銀幣有差臨安府書送贈
儀復遣執政就驛賜燕伴使有私覲次日乘馬
出關登舟又次日遣近臣賜御筵自到闕至朝
辭密賜大使銀一千四百兩副使八百八十兩
餘衣帶有差集中賜金使諸口宣按之典儀悉
皆符合故
節錄於此

有勅使華成禮星傳言還爰致珍醪仍頒芳核併推邦

數增煥歸塗

賜大金人使賀天申節賜內中酒果口宣

有勅眷言賓館少駐使華錫以芳醪副之珍果茲悉從於內府以曲示於殊私

賜大金人使賀天申節回程赤岸賜酒果口宣
有勅使軺遠暨炎暑屆辰深惟跋履之勞宜有甘芳之錫式隆眷待用示恩私

賜大金人使賀天申節內中酒果口宣

有勅遠將使指茲慶生朝宜有分頒用資衍樂芳醪旅
核併示眷私

賜大金人使賀正旦到赤岸賜酒果口宣

有勅遠馳使傳將次國門經涉實勞宜加眷禮芳醪美
實併示殊私

賜大金人使賀天申節上壽畢歸驛賜酒果

口宣

有勅慶禮既修賓儀茲備適歸舍館爰示宴慈就錫甘

芳併昭眷待

賜大金人使賀天申節射弓賜酒果口宣

有勅載驅使傳來慶生朝茲率舊章爰陳賓射就致
甘芳之錫用昭眷待之隆

賜大金人使賀天申節朝辭訖歸驛賜酒果口
宣

有勅已修慶禮將飭歸輶頒內府之甘芳表邦儀之勤
腆以昭厚意併示眷私

賜大金人使賀正旦回程赤岸賜酒果口宣

有勅載飭征驂既遵歸路念川途之方遠頒芳旨以宜
豐用致殊私式昭眷體

賜大金人使賀正旦畢歸驛酒果口宣

有勅肅將信幣來會歲朝既講慶儀肆頒燕衍芳醪珍
核申錫殊私

賜大金人使在驛牲餼口宣

有勅肅驅使傳遠歷修途已從賓館之安宜厚餼牽之

禮茲循舊典用示殊私

賜大金人使賀天申節在驛賜牲餼口宣

有勅抗旌將命就館即安眷惟經涉之勤用錫餼牽之禮肆昭至意式厚殊私

賜大金人使賀正旦在驛賜牲餼口宣

有勅馳軺至止授館云初欲昭禮意之隆爰致餼牽之錫是為邦數式表恩私

賜大金人使賀正旦密賜大銀器口宣

有勅即安賓館既展慶儀深嘉使事之勤宜厚匪頒之禮茲惟異數用示眷懷

賜大金人使賀正旦賜銀鈔鑼唾孟子錦被褥口宣

有勅將展慶儀已安賓館宜致燕私之用肆頒器服之華式表眷懷是為殊渥

賜大金人使賀正旦密賜大銀器口宣

有勅遠飭輜軒即安亭館既克修於使事宜加厚於匪

頒爰分器物之華以適燕私之用

賜大金人使賀天申節賜射弓箭例物口宣

有勅星軺少憩射圃肇開共欣觀德之儀用致匪頒之
渥式彰誠意以示眷懷

賜大金人使賀正旦射弓例物口宣

有勅星傳少安射儀斯舉方共嘉於觀德宜致厚於匪
頒庸示眷私其承茂渥

賜大金人使副春幡勝春盤等口宣

有勅遠飭使輶適逢春候爰致珍盤之饌仍頒寶飾之華特示眷私用迎新祉

賜大金三節人從春幡口宣

有勅遠隨使節備歷修途既值令辰宜申寵錫爰頒寶飾以介春祺

賜大金人使副賀正旦春幡勝口宣

有勅遠飭星輶踐修慶禮適屆春元之節宜加寵錫之恩肆舉彛儀式昭眷意

賜大金都管三節人從春幡勝口宣

案南渡典儀又載北

使到闕使副之外又有上節中節下節諸名色其賚賜降於使副

有勅遠從使傳來會慶儀歲律更端春陽紀節推之
邦數將示寵頒

賜大金人使副賀天申節端午節扇帕頭髻紗
帛等口宣

有勅使節遵途星軺夙駕適佳辰之甫屆宜篚實之分
頌用示渥恩實惟異數

賜大金都管并三節人從端午扇帕頭髻紗帛
等口宣

有勅遠隨信使來講慶儀茲遇佳辰宜有寵錫式惟異
眷其體至懷

賜大金人使回程金鍍銀合盛龍鳳茶口宣

有勅肅驅輶傳將整歸塗緬惟川陸之遙宜致珍芳
之錫茲惟異數用表眷私

賜大金人使賀天申節鎮江府賜茶藥口宣

有勅抗旌講好飛傳載馳適逢炎燠之辰當有珍芳之
錫式昭隆敷用示至懷

賜大金人使賀天申節回程龍鳳茶金鑲銀合

口宣

有勅使華遠暨已事言旋炎暑方深遵塗勤勩爰頒珍
品以示眷懷

賜大金人使賀正旦鎮江府茶藥口宣

案典儀所載無

鎮江府及平江府盱眙賜茶藥御筵之文想未
定都臨安之前鎮江平江盱眙皆通行在故有

是賜定都以後則以赤岸為止密所記乃乾溥以後事故不載鎮江平江盱眙也附識於此

有勅肅將使指載涉修塗適當凝返之辰宜有珍芳之

錫式昭眷意以輔至和

賜大金人使賀正旦回程賜龍鳳茶口宣

有勅稱觴通好馳傳遄歸方復歷於修途宜寵頒於珍

賜其膺殊錫深體至懷

賜接伴使副春幡勝口宣

有勅卿等奉命言旋逢春茲始宜加錫寵庸示恩私肆

頒寶飾之華以導善祥之集

賜接伴使副端午令節扇帕頭髻口宣

有勅卿前迓使輶載馳暑路既適逢於佳節宜昭示於至恩爰錫匪頒往其祗服

賜接伴使副春幡勝口宣

有勅卿馳輶將命遠迓使華茲屬青陽肇新時序特頒寵錫以示恩私

賜大金人使賀正旦回程鎮江府賜御筵口宣

有勅肅擁使華言遵歸路念川途之既遠計徒御之少
勞爰啟芳筵式隆異數

賜大金人使賀正旦回程盱眙軍賜御筵口宣

有勅肅揚旌飾已次淮壖幸徒御之暫留秩樽壘而式
燕用光歸路宜體眷懷

賜大金人使回程盱眙軍賜御筵口宣

有勅肅驅旌騎已近封圻載惟行李之勤方涉歸塗之
遠肆陳燕集用示眷私

賜大金人使賀天申節鎮江府賜御筵口宣

有勅肅將信幣來展慶儀既遠歷於川塗當少勞於騎
從式頒燕衍以示眷私

賜大金人使賀天申節平江府賜御筵口宣

有勅肅持使節來慶誕辰既遠涉於川塗想不無於勞
勩特頒慈宴用示寵恩

賜大金人使賀天申節回程盱眙軍賜御筵口

宣

有勅使傳光華方勤於原隰歸塗修遠將度於封圻肆
展邦儀式頒慈宴

賜大金人使賀天申節回程平江府賜御筵口

宣

有勅使傳言旋適經輔郡深念炎蒸之候不無跋涉之
勞爰錫芳筵用昭慈惠

賜大金人使賀天申節回程赤岸賜御筵口宣

有勅肅馳輶傳來會誕期適屆炎蒸諒多勤勩肆備陳

於慈宴以昭示於眷懷

賜大金人使賀正旦回程平江府賜御筵口宣
有勅肅駕傳車暫休會府言念征行之際豈無跋履之
勞爰秩賓筵用昭恩意

賜大金人使賀正旦回程赤岸賜御筵口宣

有勅講儀已事馳傳言旋少留從騎於近郊肆錫娛賓
之廣宴茲推異數以示至懷

賜大金人使賀正旦射弓賜御筵口宣

金定口本全書
卷七
有勅星軺初至賓館少休欲觀游藝之功茲舉射侯之
禮就頒慈宴用示眷懷

賜大金人使賀正旦朝辭訖歸驛賜御筵口宣
有勅遠馳駟牡來慶三朝訖事言還戒塗在即肆頒燕
衍用示殊私

賜大金人使賀天申節上壽畢歸驛賜御筵口
宣

有勅端節遠來慶儀既舉復即安於賓館宜特頒於宴

慈特示至懷用昭腆數

賜大金人使賀正旦盱眙軍賜御筵口宣

有勅載驅輶傳來慶春朝初入封圻實勤徒御肆嘉燕
勞以示眷私

賜大金人使賀正旦鎮江府御筵口宣

有勅講修鄰好遠飭使華既經涉於川塗念不無於勞
勩肆陳勞燕庸示眷懷

賜大金人使賀正旦平江府御筵口宣

有勅肅將使指來會慶期眷言經涉之勤宜加燕衍之
禮式昭茲惠以慰馳驅

賜大金人使賀正旦到赤岸賜御筵口宣

有勅肅將信幣來慶歲朝已次近郊念多勞勩特頒燕
衍用示眷懷

大金人使賀天申節賜射弓御筵口宣

有勅射侯既抗賓禮備陳式旌游藝之良爰錫示慈之
宴丕昭殊眷用表至庸

賜大金人使朝辭訖歸驛御筵口宣

有勅遠持信節來慶歲元既畢事以終儀將回轅而戒
路肆頒燕衍用示眷私

賜大金人使回程臨平鎮祖送賜御筵口宣

有勅使華成禮夙駕言還眷惟歸路之遙宜有祖行之
寵式資燕樂用示恩私

賜大金人使回平江府排辦御筵口宣

有勅肅擁皇華已成使事言赴歸途之遠不無行李之

勞茲舉邦儀特頒燕衍

賜大金人使回程鎮江府賜御筵口宣

有勅肅擁使華遠搖歸旆言念川塗之勤申加燕衍之儀邦數務隆眷懷茲厚

賜大金人使回程赤岸賜御筵口宣

有勅肅持使傳初歷歸塗增輝原隰之華申賜豆籩之燕周紆勤勩特示眷私

撫問知湖州程克俊賜銀合茶藥口宣

案宋史全文續

通鑑紹興二十六年六月丁丑新知湖州程克俊參知政事此蓋於其初之鎮時賜之也湖州宋史宰輔

表作明州誤
附識於此

有勅卿以碩德偉望臨鎮近藩諒惟宣布之勤宜遂冲和之適爰致珍芳之錫併昭眷寵之深

賜瀘南沿邊安撫使李文會夏藥口宣

有勅卿任當重寄分鎮巨藩時方屆於炎曦理宜遵於輔養爰頒靈劑用示眷懷

賜四川安撫制置使蕭振夏藥口宣

有勅卿望重禁塗任居連帥茲屬炎蒸之候豈無夙夜
之勤珍劑分頒輔養和粹

賜御前都統制吳璘楊政夏藥口宣

有勅卿以良將之才任總戎之寄時當暑候宜保至和
肆頒良劑之珍用示眷懷之意

賜御前都統制吳璘楊政下統制統領將佐官
屬夏藥口宣

有勅卿等被命効才任當參伍適屆炎曦之候不無勞

勩之懷爰致渥恩式頒珍劑

賜姚仲夏藥口宣

有勅卿蚤膺委寄備著忠勤當茲炎赫之辰宜示眷懷
之意特頒靈劑以輔至和

賜姚仲下統制統領將佐官屬夏藥口宣

有勅卿汝等才副選掄任分邊寄適屆炎曦之序豈無
夙夜之勤靈藥肆頒其承茂渥

賜知湖州程克俊夏藥口宣

欽定四庫全書
卷七
有勅卿以傑才班條近輔方炎歊之在候宜資養於至
和珍劑分頒其體眷意

賜瀘南沿邊安撫使李文會夏藥口宣

有勅卿以偉望遠鎮邊陲方時炎蒸宜加輔養特頒珍
劑用示眷懷

撫問統制田師中岳超王權劉表賜銀合臘藥

口宣

有勅卿任屬總戎實膺重寄時當凝馭宜慎保調珍劑

分頒式昭眷意

撫問諸路安撫使賜銀合臘藥口宣

有勅卿位隆舊弼往殿帥藩凝互之辰保調宜謹肆頒
靈劑用示至懷

賜姚仲臘藥口宣

有勅卿以材猷任當邊寄屬時凝互宜示撫存珍劑分
頒式昭至意

賜姚仲下統制統領將佐官屬臘藥口宣

有勅卿汝等俱以藝能並分忠幹初寒屆候節肆示恩
靈劑分頒用昭眷數

欽定四庫全書

樵溪居士集卷八

宋 劉才邵 撰

表

辭免起居舍人表

案史稱高宗即位才邵以親老歸侍居閒十年以廖剛薦

遣秘書丞歷吏部員外郎遷軍器監既而遷起居舍人未幾遷中書舍人兼權直學士院考宋

史全文續通鑑載才邵除軍器監在紹興十一年八月則其由起居舍人遷中書舍人當在十

二年故集中所載制詞多自十二年以後所撰擬者即此可以證其歷官之歲矣附識於此

今月二十二日准尚書省劄子節文八月二十三日三

省同奉聖旨除臣起居舍人兼權中書舍人日下供職者聞命震悚不知所從竊以左右記注之官秉筆殿陛日瞻清光宜得純明茂異之才以副選求之意其或弗稱公論豈容如臣行能不優望實素乏獲叨科選累沐恩除揣分量材已難報塞復茲超躡益用兢慚况詞掖之偶虛俾攝承而書贊倘遂冒處實累公朝仰冀天聰察臣誠懇不難改命別付時材庶俾明恩不為虛授所有恩命未敢祇受伏望聖慈特降睿旨追還誤恩以安

愚分伏候勅旨

謝中書舍人表

臣某言伏奉告命授臣試中書舍人兼權直學士院仍
改賜紫章服者叨膺宸制進掌綸闈申命惟行撫躬增
惕臣誠惶誠懼稽首頓首竊以彤庭紅藥密睽清切之
司紫誥黃麻同是坦明之訓况逢華旦茂建治功渙號
風馳異權天運王度式如金玉聖言炳若丹青宜得時
髦助宣德意深達帝王之制遠追虞夏之書豈圖明恩

猥及庸品伏念臣器能無取智識非長濫竊兩科因循
三紀中備嘗於憂患已絕望於清華頃沐矜憐特從召
對俾還冊府浸歷官曹繼被寵光獲司記注侍威顏於
便殿攝內外之制詞自覺崔沂之非優慙類德輿之獨
掌曾無已試之效仰當因任之明退揣空踈敢期甄錄
蒙就除於西掖仍權直於北門振拔纔數月之間超躡
預近班之列載惟優渥出自生成此蓋伏遇皇帝陛下
道格堪輿治臻平泰德輝旁燭天度并包方並進於羣

材以共熙於庶績顧雖小善亦務兼收臣敢不仰體曲
成益堅素守叨榮恩重知稱塞之為難圖報命輕雖糜
捐而不憚臣無任瞻天荷聖激切屏營之至謹奉表稱
謝以聞

漳州到任謝表

案史稱才邵為中書舍人兼權直學士院帝稱其能文時宰忌

之出知漳州考何喬遠閩書載才邵任漳州在紹興十六年中間兩奉祠直至二十五年恭檜死後始得召也附識於此

臣某言准告除知漳州軍州事主管學事兼管內勸農

使已於本月二十日到任交割職事訖備員西掖莫副
選掄宣化南邦尚叨委使恩深淪骨感極生慙臣某中
謝伏念臣章句小儒斗筭凡器才不足以應用識不足
以造微頃自膠庠忝竊名第但自憐於短拙豈敢望於
高華忽奉制綸獲居書府暨遷省戶寢歷禁塗粵從言
動之司兼掌內外之制寵榮過分譴累自招仰蒙容貸
之恩叨分師帥之任惟臨漳之古郡實閩部之輿區既
接汀虔每罹寇盜雖幸逢於衰息正有賴於藩宣宜得

循良上寬顧念豈圖殊渥猥及微臣此蓋恭遇皇帝陛下道樞得其環中德澤施於方外兵寢而刑幾措時和而歲屢登當興運之既開攬羣才而並用致茲頑鈍亦預甄收臣敢不欽奉訓詞推原德意布宣寬恤之詔以慰遠民期殫夙夜之心庶收微效

賀元旦大朝會表

案表詞有職守虎符心馳象闕之語與以下諸表皆其知

漳州時所上也附識於此

歲律肇新講會同於百辟天顏有喜受圖籍於三朝禮

舉熙朝歡騰率土中賀恭惟皇帝陛下性由天縱道本
生知紹列聖之宏規開中興之寶運履端於始明堯歷
以謹時受福無疆考夏正而建統事兼前代治屬昌辰
臣職守虎符心馳象闕載瞻天仗阻稱椒栢之觴敢效
封人仰祝椿松之壽

謝歷日表

迎日推策慶衍無疆治歷明時恩頒有截恭承欽授之
意益加拜賜之榮中謝伏惟皇帝陛下道極成能文存

稽古秉天地之正而御六氣之辨通神明之德以類萬物之情申命日官分頒歲歷臣叨膺郡寄宜謹明時曰暘曰雨而不違雖莫測範圍之妙或耘或耔而加勸顧敢忘奉順之勤

又

謹大法而協五紀置閏月以定四時寶歷分頒遠邦咸暨深惟欽授敢怠遵行中謝竊以考合陰陽究觀象數探日月五星之運見天地萬物之情茲王正之大端實

金定四庫全書
卷八
聖人之能事恭惟皇帝陛下對時育物合德先天益隆
復古之初盡舉宜民之政分至啓閉序默契於璇璣溫
暑涼寒氣常調於玉燭臣叨分符守獲拜璽封誓殫宣
布之勤肅奉使令之意庶收薄效仰副深仁

天申節賀表

夏爲朱明允協乘離之正火得天統因昭申命之祥欣
逢震夙之辰願奉延長之祝如山增固率土竭誠中賀
恭惟皇帝陛下纂紹丕基恢隆大業任賢論相坐收平

泰之功稽古右文益闡純熙之化道備帝王而事該仁
聖德侔商周而功光祖宗茂膺有永之年克受既多之
祉某嘗叨近列獲守遠邦瞻有喜之天顏阻聞晝漏祝
無疆之聖壽願効華封

天申節賀表

大火既中奮祥輝而有赫真人撫運慶景命之方申凡
屬照臨同申頌願中賀恭惟皇帝陛下誠參化育道格
堪輿敷政行仁好生本天地之大德修文稽古寢兵全

帝王之極功民說無疆神介景福臣頃叨近列出守遠
邦想雲龍之庭莫陪手舞祝椿松之壽但切心傾

賀冬節表

伏以氣序潛萌慶一陽之初復威容有赫洽百禮以丕
昭盛典旣行綿區胥悅中賀恭惟皇帝陛下纘承大業
懋建中興偃武修文坐格淳熙之治體元則大面稽奉
順之和茂對昌辰導迎景貺臣叨分符竹注想雲天瞻
北極以稱觴阻陪熙事祝南山而獻壽但竭微衷

謝御書春秋左傳表

遵周制而作經肇著一王之典灑宸毫而肆筆適優八
法之神寶軸分頒海邦咸被觀瞻所暨歡抃惟均中謝
竊以仲尼約史成文將以懲惡而勸善左氏受經立傳
是宜廣記而備言顧茲表裏之相資殊彼見聞之或異
發揮與旨遭遇聖時屬清燕之餘閒攄神心之妙畫刻
之琬琰昭若日星共知拜賜之榮益慶逢辰之幸恭惟
皇帝陛下智由天錫聖本日躋息民收至治之功稽古

闡右文之化點翰遠同於犧畫崇儒增煥於麟經褒及
素臣榮逾華袞龍鸞飛動騰逸勢以交馳奎壁光芒麗
慶霄而旁燭茲惟創見夙絕前聞臣嘗近清光獲叨遠
寄嘉與承學之士永懷分賜之恩鑽仰忘勞肅奉君師
之訓漸摩所及益知名分之歸

謝御書樂毅論表

聖謨宏遠誕揚良將之風寶墨分頒共識至仁之意明
恩遠暨綿宇均歡中謝竊以戰國方務於兼并謀臣但

資於權譎競起侵吞之志曾無遠大之圖惟時燕昭專
任樂毅初連五國固欲就於大功終緩二城蓋不收於
近效兵非爲利志在求仁惟義烈之丕昭宜褒評之曲
當聖心俯鑒確論益彰恭惟皇帝陛下道冒域中澤霑
方外治格丕平之景運世蒙兼覆之至恩載嘉析理之
篇深得著書之旨賁之宸翰驚鳳翥以龍翔煥乎天光
若漢回而星照豈圖遠服獲預榮觀臣叨守海邦恭承
德意千齡難遇敢忘宣布之勤什襲以藏當見護持之

謹

謝賜勅書表

准進奏院遞到勅書一道付臣爲戒諭奉行寬恤事臣
已望闕遙謝祇受訖一札十行丕昭德意四方萬里咸
識天心叨備承流敢忘恭命中謝竊以聖神御宇平泰
協期道化浹於無垠恩施周於有截肆頒寬大之詔備
見丁寧之辭務令溥率之民共樂舒長之化舉茲能事
屬在昌時恭惟皇帝陛下持慈寶以好生運道樞而撫

世如天如地同堯舜之至仁克儉克寬兼禹湯之盛德
期增固於邦本深軫念於民情睿澤旁流詔書屢下尚
慮奉行之吏未殫宣布之勤申錫璽封具明邦憲用警
有位俾既厥心洪覆博臨羣情感悅臣濫膺郡寄遠守
海邦當恪奉於詔條誓服勞於夙夜庶收薄效仰副至
恩

謝宮觀表

領郡牧民慙無政績奉祠得請仰荷天慈拜命以還感

恩無極中謝伏念臣學非造道才不逮人被教育於膠庠遂叨塵於名第既登仕籍寢厯年華值聖旦之中興收羣材而並用顧雖庸陋亦被使令累沐恩除遂參從列慚未伸於報效蒙曲賜於包荒俾自西垣出守南土奉寬大之詔令雖竭愚誠論師帥之承宣茂聞政譽當瓜期之將及丐祠祿以全生特荷允從最爲優幸此蓋伏遇皇帝陛下與天合德澤被有生如日之升明無不燭撫隆平之景運施博大之至恩憐其晚暮之年賜以

便安之惠臣敢不恭承德意益勵丹衷致勤香火之緣
幸依真馭仰祝聖人之壽願比南山

代辭免加功臣實封表

帝惟聖之能饗德音方霈於熙成名者君之所司寵數
豈容於冒處輒披悃愾度俟矜俞中謝伏念臣自信朴
忠素疎遠業歷更文武之劇任曷究安危之大機引疾
自陳懷章得請伏遇聖上參稽禮典初歛陽郊臣於此
時適守故里安然臥理既垂夙夜以侍祠罔有貢珍以

助毫釐之經費迨升禋之已事首均澤以疏榮美號載
加真封兼行顧罔功之被獎尤非據以包慙伏望皇帝
陛下全度海涵大明日照洞微衷之必至追成命於已
行特寢誤恩俾安愚分

代相公以下謝賜御製宣德樓上梁文表

表中天之華闕益壯皇居抗雄虹之長梁載歌睿藻方
與羣情而共慶更叨善本之分頒拜賜矜榮披詞感幸
中謝竊以漢直蒼龍而作制豈曰辨方唐標丹鳳以揚

名僅能徵吉遠考成周之典法實崇象魏之觀瞻將昭
示以表儀必恢張於憲度載圖偉蹟允屬熙朝惟觀闕
之相因歷歲時而滋久爰頒詔旨增菽規模役不及民
成於累月對經塗而臨萬宇闢飛闥而備五門法閭闔
以昭曉煥觚稜之竦峙用宏茲賁彰帝室之彌文遙觀
厥成揆雲章而申頌以導迎於殊祉因備載於明模粲
然奎壁之光鏘若英韶之韻敢期隆賜俯逮近僚仰荷
眷憐益難報稱此蓋伏遇皇帝陛下紹隆丕構恢拓宏

基致海宇之奠居廣仁天之光宅邁千齡之運治已格
 於重熙受萬國之朝勢莫先於圖大隆上都之遑躒取
 朱制而穹崇丕闡煥文誕敷景鑠式顯肯堂之孝豈為
 考室之詩特示寵光曲加賚賜啟芝封而展誦驚蓬室
 以生輝臣等叨處近司獲逢華旦仰佩出中之賜益堅
 歸美之誠做太紫之圓方既建洪圖而永固參天地之
 化育更觀妙用於無窮

謝除給事中表

案宋史本傳不載才邵曾為給事中且表詞有倦游不遂羈旅

入朝之語與才邵出處不合恐非才邵所作或代人爲之者耶附訂於此

欽承威命備禁闥腹心之臣職典樞機司納言夙夜之責必有論事回天之力少追昔人還詔之風豈以臣愚謬承人之中謝伏念臣倦遊不遂羈旅入朝少苦病衰無復事爲之志晚嘗憂患益頽榮進之心頃廁從班濫汚辭禁叨踰過分已爲衆楚之咻憎疾滿前重以千人之指敢貪非望復蹈駭機此蓋伏遇皇帝陛下總攬衆工委成職業深惟封駁之要地慎擇學問之能臣顧豈

妄庸所宜躡處伏況臣憂危積疾恐懼熏心哀籲聖慈備
陳丹赤東隅已往冀收效於桑榆失旦未忘思復鳴於
風雨

狀

權中書舍人舉自代狀

蒙恩授前件職准令節文侍從官授訖三日內舉官一
員目代伏見左宣教郎守祕書丞兼國史院檢討官益
王府教授嚴抑操履方重學術通明詞章之工溫純有

體寘之近列必能上副東求之意臣所不如舉以自代
實允公議伏候敕旨

辭免工部侍郎狀

案史載才邵拜工部侍郎在紹興二十五年蓋距出守漳

州以迄奉祠至是十一年秦檜已死乃有是命也附識於此

右臣今月二日准尚書省劄子二月一日三省同奉聖
旨除臣工部侍郎日下供職者聞命震驚罔知所措竊
以參貳六卿禁塗高選宜得茂異方副東求其或非才
難塞時論如臣行能無取望實素微生逢盛明得階仕

進累蒙除擢茂著涓埃今復叨踰益慙非據儻遂冒處
如公議何欲望聖慈察臣愚懇追還成命俾得自安且
使明恩不爲虛授謹錄奏聞伏候勅旨

進銀狀

運協千齡肇基此日職脩萬國咸獻厥珍前件銀品列
貢金瑞標山甕願少充於庭實用仰祝於聖朝

論推行經界諸路縣分不均稅事狀

案宋史全
文續通鑑

紹興十三年閏四月壬寅詔人戶應管田產雖
有契書而今來不上砧基簿者並拘沒入官用

兩浙轉運副使措置經界李椿年請也
才邵此狀當即上於此時乎附識於此

臣伏見朝廷設經界之法所以均稅而便民然諸路縣
分推行不同其間或有只通一鄉均稅事實未便臣嘗
詢訪所以頗見源流蓋緣自來人戶有身居甲鄉稅多
其相交易於田契上聲說其田係載甲鄉稅錢若干稅
既有往來故未覺不均之患經界之法旣行租稅各有
歸著若但據一鄉均稅則稅少而田多者受其利稅多
而田少者受其害且如一縣之內一畝上等之田畝步

之廣狹均也色額之高下又均也却有一鄉受稅十文者有一鄉受稅二十文者有一鄉受稅三十文者其餘等第亦皆相類多寡相遠至於如此多者既有偏重之患則田之所入不足以了官租遂至於逃移逃則拋棄田業無人承佃而官司常賦之額將有所虧公私皆受其患豈小也哉今畝步已定色額已分更無打量相驗之勞但將元係分鄉均稅處改從合一縣之數而均之檢照稅簿寬以日限自無騷動之患而有均一之利矣

臣愚欲望聖慈特降睿旨許令縣分將所管稅數通縣均敷更不分鄉庶得輕重適平以仰稱陛下矜念元元之意不勝幸甚取進止

劄子

吏部郎官上殿論銓試劄子

臣竊惟朝廷設銓試之法以待出官之人各隨所長場數不一其間試之以刑統義欲以觀其知法律之意試之以時議欲以觀其達古今之變皆學以從政者所宜

盡心故以是待之蓋將求實用之才非徒校工拙於文詞之間也然自來試題往往於刑統義則專取詞句分明而未嘗及於罪法之輕重於時議則泛用經史事迹而未嘗近於時務之利害誠皆如此則後來者惟文詞之習其何以仰稱設科選材之意乎臣區區愚見欲望聖慈申命攸司立爲定式凡銓試出題於刑統義必兼以罪法之疑似於時議必參以時務之因革使之各隨所見得售所長則其從政也將見有以允協獄情通曉

世變其爲益也豈小補哉取進止

論薦舉乞加勸沮法劄子

虞舜躬濬哲之資明黜陟之法以臨照百官小大之才
宜無不察至於命九官咨詢於下當時之臣更相稱譽
因舉而用之遂能代天工熙庶績垂衣拱手坐收無爲
之功則求賢之效豈不盛哉恭惟陛下聰明睿智出於
天縱羣臣能否灼見不疑然睿意勤勤思所以廣求賢
之路凡侍從之臣受命之初各得舉所知以自代虞舜

用心無以復加臣愚欲望聖慈特降睿旨凡所舉之人已經試用者時加考覈其有績效顯著或不如所舉因加勸沮庶進賢者有以顯其能謬舉者無所逃其責以仰稱求賢如不及之意不勝至願

奏乞宗室授嶽廟劄子

臣竊見宗室小使臣校尉陳乞嶽廟差遣依建炎四年六月五日指揮召保官赴部自陳竊詳歸明人添差不釐務去替半年尚許於所屬保明陳乞就注今來宗子

却令盡須赴部內有滿罷又初到部之人在外州軍去
行在遼遠往來艱難重有勞費甚非所以仰稱朝廷惇
叙優恤之意今來欲將一應宗室在外州軍依前項指
揮召保繳連出身家狀脚色并保狀願就某處州軍居
住許經所屬陳乞本州委官點對保明申部依條差注
施行如愿赴部自陳者聽若州軍申到陳乞嶽廟依條
許指五處如同日有到部人陳乞先差到部人伏乞詳

酌施行

辭免中書舍人劄子

今月十七日准尚書省劄子節文此月十七日三省同奉聖旨除臣中書舍人依舊兼權直學士院日下供職者臣聞命震驚罔知所措竊惟右省為政令基本而西掖詞命之臣實兼潤色論思之任方陛下肇開興運丕闡治功令行風雷明並日月宜得俊乂以稱選求顧如愚臣才識昧陋兼自攝承之後已虞曠累之多仰賴包荒敢期選授况復權行於內制尤非小己之能堪若遂

冒居難厭公議所有恩命未敢祇受恭望聖恩察臣誠懇追還成命別選時髦庶俾明恩不為虛授伏候勅旨

陳請保治劄子

臣聞治天下之大要在於闡道御世以大有為以新天下之耳目可者因之弊者救之以興變通之利以收善治之功而已恭惟陛下聖人旁燭英斷不疑比頒明詔訓迪中外圖回庶政加惠黎元號令一新百度咸舉上焉有以得天之意下焉有以慰民之心於是天下之民

莫不懽忻鼓舞以自慶快而天下之勢益趨於平泰而無虞非闡道御世以大有爲何以致此然臣聞致治非難持之為難持之之難不在於他臣願陛下懋不息之誠以永保無疆之休於此尤加意焉天下幸甚取進止

乞頒聖學下太學劄子

臣聞天佑下民作之君作之師惟其克相上帝寵綏四方蓋治之之謂君教之之謂師治之教之之功天不能以自爲必付之帝王帝王以盛德履尊位克稱君師之

任用能相天而成其能四方之民賴以寧謚唐虞三代
之盛見於詩書之所傳率由此道其後去聖既遠無所
折衷異論肆行而道統益微漢興百年稽古禮文之事
乃克修舉孝宣增光前列留意藝文爰詔諸儒講論五
經同異於石渠且使平奏其議躬自臨決章帝建初間
復修石渠故事因著其說爲白虎通議雖未能方駕前
古而發揮聖道豈云小補兩漢之文於斯為盛載在方
冊光華至今恭惟國家膺受駿命聖聖相承雲章奎文

光輝相燭非若前代歷世十數而好文之主纔一二見也陛下溫恭濬哲之資緝熙光明之學紹開興運纂修列聖之丕緒萬幾之餘無所嗜好獨玩意編簡考觀前言凡妙旨所寄精微浩博昔人之所未覩者皆獨得於心術之妙雖堯舜禹湯文武汲汲以成帝王之極功何以過此豈留意於章句之同異者得以望清塵哉天相斯文世道交興宗社再安兵革偃息而聖謨經遠首以育材爲務爰頒詔旨崇建太學以垂教多士導民設教

之意勤勤如此君師之任可謂兼全之矣夫學者以聖
王爲師親逢斯時誠千載之遇也搢紳韋布之士豈無
望於餘光哉兩漢之事不足爲今日獻臣愚不勝區區
大願欲望聖慈於清燕之間凡微言與旨自得於聖心
者頒之儒館學宮俾承學之衆得以味道真而泳聖涯
莫不精白以承休德仰副陛下恢崇至道開明羣心之
意天下幸甚取進止

乞招填禁軍教閱仍不得冗占劄子

臣竊觀周宣王能恢復境土使文武之功不墜詩人歌之列於二雅勲烈之盛光華至今原其所以致此者其大要在於內修政事外攘強敵而已恭惟陛下光闡丕圖規恢大業勲賢並用文武協謀號令一新天聲遠暨振長策以兼制方親總於六師訓辭丁寧德意隆厚內外之任既一軍國之政交修恢拓之功日月可冀詩人所歌蓋將復見於今日則夫政令之大者固已講明備具矣惟是禁軍之法州郡奉行因循廢弛申嚴成憲

正有所待臣伏見近年以來諸州禁軍例多闕額既不
以時招填而見存之兵其係將者將官主之不係將者
兵官主之往往公然冗占役使營私教閱不時日益偷
惰徒有養兵之費而無應用之實雖小盜竊發不能擒
制多是臨時申乞差兵動經時月方到本處而統制等
非州郡所轄客主勢異百方邀求夫兵至後時則賊勢
滋蔓難於勦除邀求既廣則犒賞過豐民力重困此最
近時之公患也臣愚欲望聖慈特頒睿旨申勅帥臣監

司恪遵條令嚴行約束所轄州郡及主兵之官責之程
限使以時招填精加教閱毋得冗占其有奉行不虔者
寘之重典則吏知所畏軍政益修盜賊聞風膽落氣奪
間或嘯聚支黨稍衆隣郡併力自足誅鋤比之臨時請
兵長寇費財其利害相遠何啻十倍惟陛下留神幸察
取進止

論追催民戶積欠姦弊劄子

臣伏覩陛下自去冬以來屢降明詔今茲求言詢及芻

蕘冀聞疾苦凡以爲民而已二帝三王之用心豈復能過於此哉民之疾苦繫於州縣其間非法害民難以條舉而積欠之弊爲害實大夫田之多寡賦則隨之歲之所入足了常賦至於不給而積下所欠者豈有他哉官吏貪殘侵漁橫率以至於此積欠之所自起也既曰積欠經歷年數之多銖鈔不存文歷散亂難以稽考因得並緣爲姦及其追催豪強形勢置而不問中下人戶獨在所先捨多急寡受賕可知既納之後不給文鈔欠籍

尚存重疊追索莫計其數所得之錢不附於歷不入於
官散為他用雖有年限放免之法往往不復遵行為弊
之多未易縷數遂使民間徧受其害監繫箠拷冤痛難
伸轉徙溝壑不知其數深可憐也臣愚欲望陛下特降
睿旨委諸路監司常切覺察取其不悛革者重作施行
庶得民間咸被德澤天下幸甚取進止

論受納追催差役劄子

臣竊見近年以來居監司郡守之任者多迎合大臣私

意鎮靜之說專務因循無所舉劾遂使郡縣之間姦貪
官吏倚法營私以困斯民民間受弊莫甚於受納追催
差役三事臣請陳其大槩倉場官吏與攬子為市阻截
人戶使就攬子米則多加合數絹則抑取輕錢或於一
石一疋別責常例計其浮費已過正數至三倍民財何
由不匱乎此受納之弊也追催官物本屬戶長今則或
以差公人為未足遂至於土豪土軍二者本以備小小
盜賊爾何預催租事乎況土豪將帶槍手土軍率其同

輩動數十人鄉民驚擾煩費何由得安乎此追催之弊也
民間自經界之後各有歸祖稅貫高低灼然易見差役
自上及下夫復何疑猾吏意在求賂每賂每闕一名必
追數戶請求脫免所費不貲歲無有已此差役之弊也
以此三者觸類而長之端緒實多為害不一不加講究
未易盡見以臣愚慮欲望陛下特降睿旨委自諸路監
司廣加詢訪凡民間利害官吏侵漁無有巨細咸得以
聞仍乞降指揮類聚委官看詳條具本末取決聖裁詳

為法禁使姦弊根穴洞見不遺雖欲循習勢將不能以
仰稱陛下愛民之意實天下之幸也取進止

齋閣晚問聖體劄子

臣伏以誕膺駿命丕赫炎暉展事泰壇將致一純之薦
端居路寢預嚴三日之齋精意默通善祥來集

景靈宮早問聖體劄子

臣伏以肅奉明禋茂昭景貺嚴郊祀於天地從周彌文
疑原廟之衣冠循唐近制既格三靈之佑備膺百順之

祥

太廟晚問聖體劄子

臣伏以儲思穆清宅心醇粹既通神而受祉茲用報功先齋戒以著誠不專盡物宸心上達天聽溥臨

太廟早問聖體劄子

臣伏以禮嚴報本孝謹奉先爰熙紫壇即致精禋之享於穆清廟克昭明德之馨祖考來寧福祥畢至

青城齋宮晚問聖體劄子

臣伏以神以孝通帝由聖饗煥威容之赫奕禮備為儀
即齋幄之靚嚴誠先盡志丕格監臨之佑倍迎滋至之
休

行禮畢問聖體劄子

臣伏以恢宗興運光闡丕圖熙事備成就茂膺於報貺
湛恩汪濊用敷錫於有生萬壽無疆四方來賀

代宰相答朱丞相賀太后回鑾劄子

案此劄當是代秦檜

答朱勝非者勝非本附和議及韋太后還臨安時勝非坐廢黜家居或以劄為檜賀故其答之

如此附識
以備考

某比者恭承皇太后歸御東朝慶自一人歡騰寰海此
實聖上孝德通於神明天心昭答亦惟碩輔嘗總繁機
謀國既深告猷有素致收成效迥絕前聞某叨被明恩
屬當重任方時多故不敢自謀仰賴沉幾悉排浮議成
茲偉績盡出睿謨克圖宗社之安肇自宮闈之慶非聖
神孰能與此顧臣子何力有焉豈圖鈞慈特枉珍翰述
邦家之盛事誠賢哲之用心褒借過優省循莫稱仰荷

謙德不勝感悚之至



